

No Servus, Diener und Habe die Ehre!

Etze kimmt dos

Nej su wos

vu Sömde, n 13. Jänner 2024



Dieter Schaurich

Gude Vursätze

Etze ös dos neue Jühr schunt zwej Wochn ahlt und moichr hout sich gude Vursätze viergenomm. Dos kennte wumeglich su ollerlej Zeug sein, wos an aln Jühre ne su gekloppt hotte odr zu vill wor. Obr wie kimmt dr Mensch uf sötte Gedankn? Giehn mr amoule a por Wochn retur. Mejestns su korz vur Weihnachtn, s ale Jühr gieht bale fort, macht mr sich su senne Gedankn. Jessesmarandjosef, dos wor wiedr su schnell vrbeine, dos ale Jühr, an nächsten Jühre muss dos andersch warn. Mr sellte sich mieh Zeit nahm fr dies und dos und amende ne ock orbeitn und kejs ne traffn. Mr kennte mieh Zeit mit dr Familche vrbrengn odr ou de Natur genissn. Mier hon su schiene Fleckl öm und ei Gablunz und ou ei dr Nähe. Unser Gablinzr Puusch hout schiene Wajge und vill zun sahn. Tutt s ock probiern, s word euch gefolln und gutt tun.

Etze gieht s wettr mit Lostrn. S Rouchn ufgahn ös fier moichn ou a guder Vursatz. Host de (zu) vill geroucht, hout s ou vill Gald gekost, su össes ehndr meglich, dossed Ufhiern kloppn kennte. Obr dou sein noch villed watre Lostr. Mr hon zwor ane ejgne Bräuerei ei Kaufbeuern, odr zu vill trinkn ös ou ne gutt. Su ej Bier nouchn Feieroubde ös ane schiene Gewounhejt, odr viere odr fömfe sein ne nutwensch und mr kennte mieh Zeit drhejme vrbrengn. Moichr hout ou ane klejne odr gruße Wompe und mechte ne mieh su vill assn. Gesoht und gemacht und a brickl Sport drzune. Ouhne Genottr gieht de ei s Musklhäusl* zun fit warn odr machst an Karree n Puusch ahindr. Obr dos ös noch ne „ollr Lostr Ende“. Hinte host de genung Meglichejtn, denne Zeit, die suwiesu knopp ös, zu vrplempern. Moichr mechte ne mieh su vill fernsahn und ehndr a schienes Bichl lasn. A andrer kuckt zu vill ei sei Wischbratl** nei und ös bale mieh Zeit an Guschebichl*** drönne wie ei dr Orbeit. Apropos Orbeit, gude Vursätze gibt s ou drhejme genung. De Hausorbeit gieht zu zwejt mejestns dopplt su geschwinde wie allejne und drnouchrn ös ou mieh Zeit fr de Familche. War etze mejnt, dos ös schunt olles, dar sellte sich froun, ob r moichmoul zu ofte „ju“ und ne „nej“ gesoht hout. Dos kennte jo ou a gudr Vursatz sein zun neun Jühre.

Wie mr sch obr abn ou sahn mog, villed vu dan Lostrn sein ne nutwensch. Dastwajgn nahm sich villed Leute sötte Sachn vur öm unneetsches Zeug luswardn zu kenn. Mehrschtns kloppt dos ou ane Weile, moichmoul sugor längr. Obr wenn s Jühr zu n Ende zu gieht, gieht die ale Leier wiedr vu vorne lus, weil mrsch doch ne dorchgehaln hout. Und pletzlich hout mr de gleichn Gedankn wie am Ende vu n letztn Jühre.

Amende wäre mr gutt beroutn, mr wäre zufriedn und glücklich mit dan, wos mr hout. Und unse Gsundhejt ös doch suwiesu s wöchtschste, wos es gahn tutt. Mejnt dr ne ou?

* Fitness-Center

** Smartphone

*** wörtl. Übersetzung für „Facebook“
